

UCAPAN YANG BERBAHAGIA
TAN SRI DATO' DR. HJ. ABDULLAH SANUSI AHMAD
NAIB CANSELOR, UNIVERSITI MALAYA
DI MAJLIS PENYAMPAIAN HADIAH SUKAN
KAKITANGAN ANTARA FAKULTI 1999 DAN
UPACARA PENYERAHAN BENDERA KEJOHANAN
SUKAN STAF ANTARA IPT KE-24
PADA 27 APRIL 1999, JAM 4.00 PETANG
DI AUDITORIUM PERDANASISWA,
UNIVERSITI MALAYA

- Bismillahir Rahmanir Rahim. Assalamualaikum
Warahmatullahi Wabarakatuh dan salam sejahtera.

- Ahli Pengurusan Tertinggi Universiti;

- Profesor Madya Dr. Johari Mohd. Saad,
Pengarah, Pusat Sukan;

- Tuan-tuan dan Puan-puan sekalian.

Syukur kepada Ilahi kerana dengan limpah kurnianya kita dapat bertemu semula di Majlis Penyampaian Hadiah Sukan Kakitangan antara Fakulti Universiti Malaya 1999 dan Majlis Penyerahan Bendera Kejohanan Sukan Staf Universiti-Universiti Malaysia ke-24, 1999. Saya pasti majlis ini adalah sesuatu yang dinanti-nantikan oleh kesemua peserta yang telah mengambil bahagian dan bertungkus-lumus untuk mencapai kemenangan.

Tuan-tuan dan Puan-puan,

Alhamdulillah, temasya sukan tahun ini telah berjalan tanpa sebarang insiden yang tidak diingini dan kesemua kakitangan yang terlibat telah mempamerkan semangat kesukunan yang tinggi.

Objektif utama temasya sukan ini adalah untuk menggalakkan lebih ramai lagi kakitangan Universiti Malaya mengambil bahagian secara lebih aktif dalam apa sahaja jenis sukan yang diadakan.

Kemudahan sukan yang terdapat dalam kampus kita ini perlu dimanfaatkan bukan sahaja oleh pelajar-pelajar tetapi juga oleh kakitangan Universiti Malaya.

Peningkatan status Pusat Sukan dan pengwujudan Ijazah Sarjana Muda Sains Sukan pada tahun 1995 menunjukkan kesungguhan pihak pengurusan Universiti Malaya untuk mempertingkatkan taraf sukan di peringkat universiti, negara dan antarabangsa.

Pengambilan pelajar-pelajar yang mewakili negara dalam pelbagai bidang sukan diharapkan dapat meniup semangat bukan sahaja kepada pelajar

tetapi juga kakitangan untuk bergiat dengan lebih aktif lagi di bidang sukan. Peluang untuk mewakili negara dalam kegiatan sukan adalah sesuatu yang amat berharga dan sepatutnya diimpikan oleh setiap orang yang bergiat dalam bidang sukan.

○ Tuan-tuan dan Puan-puan,

Temasya sukan ini juga telah berjaya menyatupadukan warga kampus dari pelbagai fakulti, jabatan serta jawatan untuk bersama-sama berganding bahu bagi mencapai satu matlamat iaitu

○ kemenangan. Penglibatan semua fakulti dan jabatan dalam kesemua lapan acara yang dipertandingkan adalah satu perkembangan positif yang patut diteruskan kerana sejarah telah membuktikan bahawa sukan berupaya untuk

menyatupadukan manusia dari pelbagai ideologi dan agama. Sukan Komanwel 1998 yang telah diadakan di Kuala Lumpur adalah satu bukti terdekat yang berjaya menyatukan rakyat berbilang kaum dan agama di Malaysia. Selain daripada itu, temasya-temasya sukan lain seperti Sukan Olimpik, Cricket Test Matches, World Cup Football, European Cup Football dan FIFA Cup juga telah membuktikan yang sukan bersifat global dan berupaya merintangi pelbagai sekatan dan sempadan.

Dalam kesempatan ini, saya juga ingin mengalukan pemergian kontingen Universiti Malaya ke Kejohanan Sukan Staf Universiti-Universiti Malaysia di Universiti Teknologi Malaysia, Skudai, Johor. Diharapkan tuan-tuan dan puan-puan mampu mempamerkan semangat kesukunan yang tinggi.

Menang atau kalah bukanlah soalnya tetapi imej Universiti yang mana namanya tertera di jersi yang tuan-tuan dan puan-puan pakai nanti patut dihargai. Selamat berjuang dan kami di sini mendoakan kejayaan semua.

- Akhir kata, saya ingin mengucapkan setinggi-tinggi tahniah kepada semua pasukan yang menang. Bagi yang kalah pula, jadikanlah kekalahan ini sebagai cabaran untuk bangkit semula dan mencapai kejayaan pada tahun hadapan. Secara peribadi, saya berpendapat bahawa tiada kekalahan bagi sesiapa sahaja yang telah mengambil bahagian kerana inisiatif untuk mengambil bahagian itu sendiri adalah satu kemenangan.
-

Sekian, terima kasih.

Wabillahi Taufik Walhidayah Wassalamualaikum
Warahmatullahi Wabarakatuh.

TAN SRI DATO' DR. HJ. ABDULLAH SANUSI AHMAD
Naib Canselor

27 April 1999